



FM15/108
Nuuk 17. marts 2015
Naaja H. Nathanielsen

Uunga siunnersuut: Aatsitassat pillugit ingerlatallu tamatumunnga pingaarutillit pillugit inatsisartut inatsisaata nr. 7, 7. december 2009-imeersup allannguuteqartinneqarnissaa pillugu Inatsisartut inatsisaat nr. xx, yy 2015-imeersoq (aatsitassanut ikummatissanullu inatsit)

(Aningaasaqarnermut Aatsitassanullu Naalakkersuisoq)

Inuit Ataqatigiinniit inatsimmut allannguutissatut siunnersuummut siullermut isornartorsiummut Naalakkersuisut tusaaniarsimanerannut nersualaarussuppagut. Siunnersuummimi tassani maalaarsinnaatitaaneq peerniarneqaraluarpoq allakkanillu takunnissinnaatitaaneq killilerniarneqaraluarluni. Naalakkersuisulli nutaat tassunga tunngasumik isornartorsiuinermut tusarnaarsimapput. Qujanaq. Aammattaaq GeoSurvey Greenlandimik pilersitsiniarnermut pilersaarutinut atatillugu Naalakkersuisut isornartorsiuinermut tusaaniarsimapput, tamannami pilersinneqassappat pisariaqanngitsumik nunatta karsianut aningaasartuutissanik pilersitsisusaagaluarimat. Pilersaarutit taakkua taamaatinneqarnerannut aamma qujavugut.

Taarsiullugulu Naalakkersuisut allannguutissanik minnernik marlunnik saqqummiussipput. Inuit Ataqatigiinniit taakkua tamaasa taperserpagut.

Inatsisiliornerup erseqqissunik sinaakkusiinissaq siunertariaannassavaa. Inatsit paasiuminaallunilu erseqqarluttoq attuumaffigisassaminut ajornartorsiuinik pilersitsisarpoq. Ajornerpaatullu ineriartortitsinermut kigaalaqutaasinnaasarluni.

Inuit Ataqatigiinniit aatsitassat pillugit inatsimmik tunngaviatigut iluarinnilluta oqaatigiuartarparput. Kisiannili aamma aatsitassanut inatsimmut allannguutissanut akuersiuartarsimavugut. Allannguutissat tamarmik pitsanngoriartitsisarsimapput. Inatsilli arlaleriarluni allanngortinneqartoq paasiuminaallisarpoq. Taamaattumillu piffissap ingerlanerani iluarsartuuttaqattaaginnarnagu inatsisip ataatsimoortumik qimerloornissaa immaqa pisariaqalersimavoq. Taamatullu paatsiveerusimaarnermik annermik pilersitsinissaa pinaveersimatillugu.

Ukiut ingerlaneranni aatsitassanut inatsit tassungalu pisortanit sullissineq

isornartorsiorneqartarsimapput. Assigiinngitsuniit isornartorsiuineq pisarsimavoq, avatangiisinut illersuisuniit aatsisatassanut ingerlatseqatigiiffinnut.

Inuit Ataqtigiinniit isornartorsiuinerup tusarnaarneqartariaqalerneranik taamatullu ataatsimoorussamik inerniliisoqartariaqalerneranik isumaqarpugut. Aatsitassat pillugit inatsisip inuussutissarsiutinit, innuttaasunit kattuffinniillu tapersorsorneqartuunissaata qulakkeerneqarnissaanut immikkut akisussaaffeqarpugut. Pitsanngorsaanissatsinni kattuffiit branchellu ulluinnarni suliaqarfimmikkut sutigut tamatigut misilittagaat atorluartariaqaraluarpagut.

Taamaattumik periarfissaq manna atorlugu aatsitassat pillugit inatsit qimerlooqqissaassagipput taamatullu siunnersuutit suugaluartut tusarnaarnissaannut siunnersuuteqarusuppugut.

Maannakkorpiarlu aatsitassat pillugit inatsisip erseqqarissuunissaanut ineriartornissamilu kigaalaqutinik nassataqannginnissaanut qulakkeerinninnissatsinnut periarfissaqarpugut. Aatsitassanut tunngatillugu ingerlatatigut nunatsinni piffissaq ingerlalluarfittut taasinnaanatigu nassuerutigisariaqarparput. Aammalu ukiuni kingullerni naalackersuinikkut aalaakkaanngitsumik inissisimanitsigut nunatta tusaamaneqaataa ajorseriarsimammat nassuerutigisariaqarparput. Nunatta aningaasaliiffigineqarsinnaaneranut sunniuteqarnerluttumik pitsaanngitsumik avammut takutittarnerata unitsinneqarnissaa isumaqatigiissutigitigu, ajornartorsiutaasinnaasullu ataatsimoorussamik aaqqinniartigit.

Siunnersuutip Aatsitassanut Ataatsimiititaliamut ingerlateqqinneqarnissaa siunnersuutigaarput. Aappassaaneerneqannginneranilu Aatsitassat pillugit inatsisip tamanut ammasumik tusarniaassutigineqarnissaanik Aatsitassanut Ataatsimiititaliaq suliakkerneqassasoq siunnersuutigaarput. Tusarniaasitsinerlu soorunami Naalackersuisut qanimut oqaloqatigineqarnerisigut pissaaq. Tusarniaasitsisoqareerpat Aatsitassanut Ataatsimiititaliaq pisariaqarpat inatsimmut allannguutissamik siunnersuuteqarsinnaavoq.

Imaassinnaavoq Aatsitassat pillugit inatsisip aappassaaneerneqarnissaata ukiami aatsaat pinissaa isummernerup matuma kingunerissagaa. Taamaakkaluartorli amerlanerit tapersersugaannik inatsiseqalissaagut, peqatigalugulu nunami maani politikerit nukittuumik aatsitassatigut aallussinissamik kissaateqarnerannik avammut oqariartuuteqassaagut.

Taamatut oqaaseqarluta siunnersuutip suliarineqaqqinnissaanut Aatsitassanut Ataatsimiititaliamut ingerlateqqipparput.